

## 9. De rapiegas, utres ya outros animales

- Lugar: Vindías, Tameza.
- Narrador: Antonio Tamargo López, 86 años (2002).
- Recopilador : J. S. L. (ATO).

**A**ntón]: —¿Coñu, pa qué vamos charlar, ho?  
[Encuestador]: —Bueno, pa charlar de lo antiguo... y después de la guerra...

---

[Antón]: —Ta charláu... si foras una rapaza curiosa, tovía... pero...

[Encuestador]: —Eso tráigola otru día, hom...

[Antón]: —No[n], no[n], acuérdome de *mi* buela, pero miou buelu matóuse'l probe mui ceo... mui aquello, ya deixóu los neñinos... miou padre quedó de doce años... el probe... *mi* padre... matóuse allá abaixón... en una peña embaixo, sí, taban segando ya punxénonse a atar una carguina de segáu, de campu, ya con una cibiella d'esas cuando tovía yá tenían grasa, ya púnxose a tirar por ella así al revés ya marchóu l'arna ya escapóu ya cayóu d'un peñón embaixo grandísimu, allí s'esnucóu, allí se matóu el probe... Había un veirón allí mui grande ya foi por encima, ya cayó allí abaixón, ya baixóu un neñu, miou probe, a vellu, ya diz él:

—¡Déjame, miou fíu, déjame, que yá toi muertu!

Y adiós, no[n] *hablóu* más el probe. Sí, no[n] *hablóu* más el probe. Sí, miou neño, ya... ¡vaya por Dios!

[Encuestador]: —Y cuando eras pequeño... ¿mandábante trabayar algo y eso?

[Antón]: —Coñu, claro, a la *leña*, ya sacar tierra por un llau ya por outru, ya tarrones, ya... *trabajando*... ya... *trabajando*, matando terrones ya subiendo tierra d'abaxo p'arriba ya... ¡hala!, sí, ya col ganáu ya las uveas ya todú eso...

[Encuestador]: —¿Ibas cola vecera algo...?

[Antón]: —¿Eh?

[Encuestador]: —¿Con la vecera ibas...?

[Antón]: —Sí, ho, aquí había una vecera mui grande, mui grande, ya en Yernes tamién... mucha, hom, en Yernes *era* mucha vecera... ¿qué sé you las uveas que habría allí? Y aquí tamién, hubo una vecera mui grande... ya... todú un rabañu, nosotros teníamos alrededor de noventa uveas, ya per eiquí muchos... todos, todú'l pueblu tenía uveas, rabañu d'uveas...

Ya cabras, había muchas cabras tamién, ya *hacienda* de yeguas tamién... ¡jui, coñu!... ya osos... el osu... son mui malos, tienen una xepona enriba'l llombu... ¡buf! Hai dos clases de... [osos], unu osu blancu ya outru osu pardu... sí, ¡y al diablu'l *mejor!* Je, je, je, ja ja ja, sí, mio neñu, ya los osos matan las vacas, ya gárranlas pol llombu... tienen unas manonas mui grandes, con un calcañón p'a-trás... ya garran las vacas pol llombu, polas *ahujas*, ya cálcanlas hasta que las echan... las tiran en suelu, ya espuós cómen-ys por delante, fan-ys un furacu por detrás de los brazos d'alantre ya cómen-ys la maquinaria que tienen toda, lu demás déixanlo... allí ta, allí, *mi* neñu, ya llévanlas arrastru lu mismu... ¿qué sé you?, son animales grandísimos, ya tienen una fuerza... ¡vaya por Dios!, ya

cómenlas... ¡hala!, ya con eso así ia la vida. Ya los raposos, ya... los raposos tirábanse en suelu, ya iban los cordeirinos ya las uveas a golellos... ya garrábanlos pol pescuezu, ya gorábanlos y hala, ellos chupában-ys la sangre ya espuós si nun tenían abondo con aquello iban a outro, ya así era la cosa. Ya espués venían... había a veces dos ou tres uveas muertas, que veníase'l demoniu de la rapiega..., ya espués venían las utres, ya dicía la gente: «¡Hai carnada, hai carnada! ¡Hai que curiar las uveas!». Iban allí por riba por esi monte d'ehí, de p'allí pa contra Rubianu, por esa sierra, ya topabas el peligru allí, las uveas muertas, las probes, goradas.

Ya espués venían las utres, abarruntaban la carnada ya venían las utres, ya cuando venían polos montes víanse preiquí, son mui grandes, mui grandes, mui grandes, blancas, mui grandes... dicen:

—¡Ui!, ¡hai carnada, hai carnada, hai carnada! Ya subía la *gente* ahí por riba por aquella sierra, que taban las uveas preillí... ya había dos ou tres muertas. ¿Ya sabes como faía la raposa pa garrallas? Tumbábase en suelu, ella, ya quedaba como si tuviera durmiendo... ya iban las ouveas a golella ya echába-ys el gancho al pescuezu ya gorábalas, ella nu[n] las comía, gorábalas, ya si nun se fartucaba con una goraba outra, ya espués venían las utres... mui grandísimas, tienen un picu... un pescuezu... espeñadonas todas, como pitas *japonesas*, así espeñadas, mui grandes. Ya así pasaba..., así era la vida, sí, *mi* neñu.

A lu fondeiru de la campa Nava había un pozón mui grande que *era* una nevera antigua de los moros, que guardaban allí la nieve pa la friura del veranu, ¿oíste?, llenábanlu de nieve, y allí con tantísima cantidá y allí nun daba muchu'l sol... pues conservaba la friura de... vaya todú'l añu, sí, ya... ya espuós allí venían... tiraban l'*hacienda*, a última hora, tiraban l'*hacienda*... espués yá particulares yá de la... de la outra vida, ya eso era cuando los moros... tiraban allí, faían eso allí, pero espuós desque marcharon los moros, pos tiraban l'*hacienda* que morría allí, ya venían las utres, ya entraban ya espués no[n] *eran* pa salir, ya iban los rapazones ya tirában-ys cuetos ya matábanlas allí, sí, ya escasianon, escasianon, ahora nun se ven prehí esos animales, *eran* mui grandes, mui grandes, namás que abarruntaban carnada, un animal muertu... yá taban allí. Sí. Ya ahora nada, ya espués allí tirábanlas allí muchu, muchas, ahí, aquí hai un pozu mui fondu, y ahí outro. Ya ési tapánonlu, cuando vieno la metralla esa tapánonlu, ya explotóu... mira, esi fueixu que ta ahí p'acá *era* del pozu ya explotóu p'ahí, al tapallu... seguramente tien gas... porque ahí cuando faía sol... cuando taba... pol inviernu mandaba calor ya pol veranu mandaba fríu... es que debe tener alguna combinación con outros sitios mui profundos, mui mal... mui fondos, porque eso ia mui fondu masiáu...

[Encuestador]: —¿Y por qué nun podían salir las utres del pozu?, ¿por qué nun podían salir?, ¿porque se fartucaban o por qué?

[Antón]: —Pues nun podían salir porque *eran* mui pesadas, *hombre*, ya metíanse aonde no[n] *eran* pa salire, *eran* mui pesadas, ya ellas metíanse a comer, pero despuós no[n] *eran* pa salire...

[Encuestador]: —¿De qué?, ¿de la fartura?

[Antón]: —Claro, ya que taban... *eran* mui pesadas, ya que nun... tenían que salir y nun había aire bastante pa ellas alear, ya espués tirában-ys cuetos los rapazones cuando taban endientro comiendo... ¡plas!, ¡pos!, ya matábanlas allí.





9. *De rapiegas, utres ya outros animales*

ANTONIO TAMARCA LÓPEZ

Vindías, TAMEZA

---

Semeya: J. S. L.

